

ում, որ այստեղից մի քանի օրոպ ճանապարհով հեռու է, բայց ես գիտեմ, որ Մըհեն քամուց ավելի արագ է գնում, նա էգուց չէ՝ միւս օրը հօրս մօտ կը լինի:

Մըհեն չէր ասել Մարօին, թե որտեղի՛ց է գալիս, բայց ես գիտեի, թե ուր էր գնացել նա եւ որտեղից էր վերադառնում: Նա եկել էր իր արիւնտտ շրթունքով աստոածածինը համբուրելու...: Չարմանալի՛ է, կրօնական զգացմունքը գտնւում է եւ ամենակատարի եղեռնագործի մէջ...: Բայց միթե՞ կարելի էր նրան եղեռնագործ համարել..

Մարօի կարգադրութիւնները թէեւ բաւականին հանգստացրին ինձ, բայց ես դարձեալ պնդեցի, թէ մեզ պետք է շտապել շուտով տուն վերադառնալու: Նա դարձեալ ընդդիմացաւ ինձ:

– Ես չեմ գնայ, մինչեւ ասածս չկատարեմ, ես այս գիշեր պատրաստուել էի, բայց...

Յեռոհից լսելի եղաւ մի մեղմ երգեցողութեան ձայն, նոյնիսկ եղանակով, որ ես լսել էի այսօր «կաթնաղբիւրիէ ծորում»: Մարօն լսելով ձայնը, փոխեց իր խօսքը:

– Այդ «ճգնաւորն» է, որ երգում է, – ասաց նա, – ինչպե՞ս լաւ երգում է, լսի՛ր, Ֆարհատ:

Եւ իրաւ, գիշերային լռութեան մէջ երգը հիանալի էր: Մարօն երկար ականջ դնելուց յետոյ, հարցրուց.

– Դու գիտե՞ս նա ով է, Ֆարհատ:

– Ես նրան չեմ ճանաչում, այսօր առաջին անգամ տեսայ նրան «կաթնաղբիւրիէ ծորում», եւ նա երգում էր միեւնոյն այս երգը: Իսկ յետոյ երեւցաւ նա իմ քեռի Պետրոսի վրանում:

– Որքա՛ն միամիտ ես, Ֆարհատ:

– Ինչո՞ւ:

– Նրա համար, որ դու չկարողացար ճանաչել քո վաղեմի ընկերին:

– Ո՞վ էր նա:

– Ասլանը:

– Չեմ հաւատում, դու ինձ վրայ ծիծաղում ես, Մարօ:

– Վեր կա՛ց, գնանք, նա մեզ կանչում է. ես հասկանում եմ նրա երգի միտքը, գնանք, մի՛ ուշացիր. նրան մէկ էլ կը տեսնես ու կը հաւատաս: